



Komunikadu Imprensa
Distritu Bobonaro
19 Novembru 2018

**Estudante Eskola Sekundária Agrikola Vokasionál Bobonaro haksolak
ho atividade treinamentu kona-ba direitu labarik no Lei Kontra
Violénsia Doméstika iha sira ninia-eskola**

Iha 8 Novembru 2018, Judicial System Monitoring Programme (JSMP) fasilita atividade treinamentu kona-ba direitu labarik no asesu ba sistema justisa formal ba Estudante Sekundaria Agrikola Vokasionál iha Sub-distritu Bobonaro, Distritu Bobonaro.

Treinamentu ne'e kobre asuntu sira kona-ba direitu labarik, asesu ba justisa formal, garante sira ba direitu labarik tuir lei internasional partikularmente kona-ba Konvensaun Direitu Labarik (KDL) no lei aplikavel relevantes sira nomós tipu krime sira ne'ebé konstitui nu'udar krime hasoru labarik iha Timor-Leste no Lei Kontra Violénsia Doméstika. Aleinde ne'e, JSMP mós introdús kona-ba knaar juis, prokuradór, defénsória públiku, advogadu privadu no polísia tuir sistema justisa formal timor-nian. Total estudante ne'ebé partisipa iha treinamentu ne'e hamutuk ema nain 30 kompostu hosi feto nain 15 no mane nain 15.

“Estudante sira iha área rural hasoru dezafiu oioin atu asesu ba informasaun ne'ebé kredivel kona-ba sira ninia direitu no knaar intituisaun públiku sira iha área justisa nian. Tanba ne'e atividade treinamentu hanesan ne'e nu'udar meu ida atu hasae no haklean sira nia koñesementu atu hatene sira ninia direitu no ajuda sira nia maluk sira bainhira sira hasoru problema” dehan Luis de Oliveira Sampaio, Diretór Ezekutivu JSMP.

Iha sosiedade ne'ebé edukasaun formal seidauk diak no asesu ba informasaun ne'ebé limitadu, dalabarak halo labarik sira sai vulneravel teb-tebes tanba lahatene sira nia direitu sira nune'e sira la bele defende sira ninia-an.

Antonio de Jesus Borges nu'udar Diretór Eskola ne'e, iha nia intervensaun haktuir katak, atividade treinamentu kona-ba direitu labarik no Lei Kontra Violénsia Doméstika ne'e importante teb-tebes tanba sei fasilita nia-estudante sira hatene sira ninia direitu. Durante ne'e seidauk iha organizasaun ruma ne'ebé mak fahe informasaun kona-ba setór justisa liuliu kestaun relevante sira kona-ba labarik sira ninia direitu no Lei Kontra Violénsia Doméstika.

Sr. Borges agradese ba JSMP ne'ebé mak bele aprosima nia eskola hodi fahe informasaun ne'ebé útil teb-tebes ba estudante sira. Liután nia husu ba estudante sira atu uza didiak tempu ne'e hodi rona no kompriende saida mak treinador sira apresenta, no

bainhira iha dúvidas ka sei iha buat ruma ne'ebé la klaru, nia enkoraza estudante sira atu husu no halo klarifikasaun kedas. Nia mós husu estudante sira atu kontinua fahe informasaun sira ne'e ba inan-aman, comunidade no kolegas estudante sira ne'ebé lakonsege partisipa iha treinamentu ne'e.

JSMP observa katak kuaze maioria estudante sira ne'ebé partisipa iha atividade ne'e la hatene ka la iha informasaun adekuaadu kona-ba Konvensaun Direitu Labarik (KDL) ne'ebé Estadu Timor-Leste ratifika ona no iha lei nasional sira seluk ne'ebé regula kona-ba protesaun ba sira ninia direitu, nomós krimé ne'ebé mak konstitui nu'udar krime ne'ebé prevelase liu hasoru labarik sira.

Tanba ne'e JSMP introdus prinsipiú báziku no xave sira hosi KDL. Konvensaun Direitu Labarik mak nu'udar tratadu nasoins-unidas (ONU) ne'ebé mais detallu no kompletu liu kona-ba elaborasaun no rekoñesementu ba direitu labarik nian. KDL hatuur no refleto direitu báziku ba labarik sira hothotu iha mundu ne'ebé inklui; direitu ba moris, dezvoltamentu, direitu ba protesaun hosi influensia aat sira, direitu atu livre hosi torturasun no explotasaun, no direitu atu partisipa ativu iha vida familia, kultural no sosial.

Partikuarmente Artigu 2 (1) no (2) KDL define katak Estadu-Parte sira tenke respeita no asegura labele hetan kualker forma diskriminasaun hasoru labarik sira no tenke foti medida apropiadu hotu atu asegura katak labarik sira hetan protesaun hasoru forma diskriminasion hotu-hotu hasour labarik sira.

Iha parte seluk JSMP mós esplika kona-ba krimé ne'ebé konstitui nu'udar krime no violénsia hasoru labarik tuir lei aplikvel no lori to'o ba tribunál. Krime sira ne'e hanesan; baku, ameasa, abuzu seksual ba menór (inklui abuzu seksuál ho natureza incestu), maustratus ba menór, no krimene'e nia implikasaun ba sira ninia dezvoltamentu.

Treinamentu ne'e mós inklui sesaun diskusaun kada grupo atu diskuti kona-ba estudu kazu no depoisde diskusaun ne'e kada grupo apresenta rezultadu hosi diskusaun ne'e.

Treinamentu ensera ho entrega JSMP nia pamfelu ba Diretór Eskola hodi bele fahe ba estudante sira ne'ebé la partisipa iha treinamentu ne'e.

Treinamentu ne'e realiza tanba hetan suporta husi Embaixada Canada iha Indonézia.

Atu hetan informasaun kle'an liu tan favór kontaktu:

Luis de Oliveira Sampaio
Diretór Ezekutivu JSMP
info@jsmp.tl
www.jsmp.tl